

简体字本二十六史

宋
书

吉林人民出版社

简体字本二十六史



卷四一——卷七一

【梁】沈 约 撰

陈苏镇 等标点

吉林人民出版社

宋书卷四一
列传第一

后 妃

孝穆赵皇后 孝懿萧皇后
武敬臧皇后 武张夫人
少帝司马皇后 文元袁皇后
潘淑妃 文路淑媛
孝武文穆王皇后 宣贵妃
前废帝何皇后 文沈婕妤
明恭王皇后 后废帝江皇后
顺陈太妃 顺谢皇后

帝祖母号太皇太后，母号皇太后，妃号皇后，汉旧制也。

晋武帝采汉、魏之制，置贵嫔、夫人、贵人，是为三夫人，位视三公。淑妃、淑媛、淑仪、修华、修容、修仪、婕妤、容华、充华，是为九嫔，位视九卿。其余有美人、中才人、才人，爵视千石以下。高祖受命，省二才人，其余仍用晋制。贵嫔，魏文帝所制。夫人，魏武帝初建魏国所制。贵人，汉光武所制。淑妃，魏明帝所制。淑媛，魏文帝所制。淑仪、修华，晋武帝所制。修容，魏文帝所制。修仪，魏明帝所制。婕妤、容华，前汉旧号。充华，晋武帝所制。美人，汉光武所

制。世祖孝建三年，省夫人、修华、修容，置贵妃，位比相国，进贵嫔，位比丞相，贵人位比三司，以为三夫人。又置昭仪、昭容、昭华，以代修华、修仪、修容。又中才人、充衣，以为散位。昭仪，汉元帝所制。昭容，世祖所制。昭华，魏明帝所制。中才人，晋武帝所制。充衣，前汉旧制。太宗泰始元年，省淑妃、昭华、中才人、充衣，复置修仪、修容、才人、良人。三年，又省贵人，置贵姬，以备三夫人之数。又置昭华，增淑容、承徽、列荣。以淑媛、淑仪、淑容、昭华、昭仪、昭容、修华、修仪、修容为九嫔。婕妤、容华、充华、承徽、列荣凡五职，班亚九嫔。美人、中才人、才人三职为散役。其后太宗留心后房，拟外百官，备位置内职。列其名品于后：

后宫通尹，准录尚书。

紫极户主。

光兴户主。

官品第一。各置一人，并铨六官。

后宫列叙，准尚书令，铨六宫。

紫极中监尹，铨六宫。

光兴中监尹，铨六宫。

宣融户主，铨六宫。

紫极房帅，置一人。

光兴房帅，置一人。

官品第二。各置一人。

后官司仪，准左仆射，铨人士。

后官司政，准右仆射，铨人士。

参议女林，准银青光录，铨人士。

中台侍御尹，铨六宫。

宣融便殿中监尹，铨六宫。

采艺房主，铨六宫。

南房主，铨六宫。

中藏女典，铨六宫。

典坊，铨六宫。

乐正，铨六宫。

内保，铨人士。

学林祭酒，铨人士。

昭阳房帅，置一人。

徽音房帅，置一人。

宣融房帅，置一人。

官品第三。各置一人。

后宫都掌治职，置二人。准左右丞，位比尚书，铨人士。

后宫殿中治职，置一人。准左民尚书，铨人士。

后宫源典治职，置一人。准祠部尚书，铨人士。

后宫谷帛治职，置一人。准度支尚书。

中傅，置一人。铨人士。

后宫校事女史，置一人。铨人士。

紫极中监女史，置一人。铨人士。

光兴中监女史，置一人。铨人士。

紫极房参事，置人无定数。铨人士。有限外。

宣融房参事，置人无定数。铨人士。有限外。

中台侍御奏案女史，置一人。铨人士。

赞乐女史，置一人。铨人士。

中训女史，置一人。铨人士。

女祝史，置一人。

紫极中监典，置一人。

光兴中监典，置一人。

典乐帅，置人无定数。有限外。

紫极房廉帅祭酒，置一人。

光兴房廉帅祭酒，置一人。

宣融房廉帅祭酒，置一人。

官品第四。

后宫通关参事，置一人。

景德房参事，置人无定数。铨人士。

采艺房参事，置人无定数。铨人士。

南房参事，置人无定数。铨人士。

内房参事，置一人。铨人士。

校学女史，置一人。铨人士。

后宫中房帅，置二人。

后宫源典帅，置二人。

后宫谷帛帅，置二人。

中台帅，置一人。

中台侍御起居帅，置二人。

中台侍御诏诰帅，置二人。

斯男房帅，置一人。

宣豫房帅，置一人。

景德房帅，置一人。

采艺房帅，置一人。

中藏帅，置一人。

内坊帅，置一人。

南房帅，置一人。

外华房帅，置一人。

招庆房帅，置一人。

紫极诸房廉帅，置人无定数。有限外。

紫极中监省帅，置一人。

紫极殿帅，置六人。

光兴殿帅，置四人。

徽音监帅，置一人。

徽章监帅，置一人。

宣融便殿中监典，置一人。

清商帅，置人无定数。

总章帅，置人无定数。

左西章帅，置人无定数。

右西章帅，置人无定数。

中厨帅，置一人。

官品第五。

中台侍御执卫，置人无定数。

中台侍御监闺帅，置二人。

中台侍御监司帅，置二人。

宣融便殿帅，置一人。

永巷帅，置一人。

后宫都掌内史，置二人。

后宫殿中内史，置一人。

后宫源典内史，置一人。

后宫谷帛内史，置二人。

后宫监临内史，置二人。

中台侍御执法内史，置一人。

中台侍御典内史，置二人。

中台侍御节度内史，置二人。

中台侍御应内史，置六人。

紫极房内史，置一人。

光兴房内史，置一人。

助教，置一人。

彩制帅，置人无定数。

装饰帅，置人无定数。

绣帅，置人无定数。

织帅，置人无定数。

学林馆帅，置一人。

宫闺帅，置一人。

教堂帅，置人无定数。有限外。

监解帅，置人无定数。

累室帅，置人无定数。

行病帅，置人无定数。

官品第六。

合堂帅，置二人。

御清帅，置一人。

监夜帅，置一人。

诸房禁防，置人无定数。

三厢禁防，置三人。

诸房厨帅，各置一人。

中厨廉，置三人。

应闺，置六人。

诸应阁，置人无定数。

宫闺史，置一人。

官品第七。

诸房中掾，各置一人。

中藏掾，各置二人。

比五品敕吏。

紫极供殿直伥。

光兴供殿直伥。

总章伎伥。

侍御扶侍。

主衣。

准二卫五品，敕吏比六品。

供殿左右。紫极置二十人，光兴置十人。

左右守藏，置四人。

典乐人。

比诸房禁防。

作伥。

比王官。

供殿给使。紫极置二十人，光兴置十人。

典殿，置人无定数。

比官人。

紫极三厢给事，置十人。

全堂给使，置五人。

宫闱给使，置六人。

比房。

孝穆赵皇后讳安，下邳僮人也。祖彪，字世范，治书侍御史。父裔，字彦胄，平原太守。

后以晋穆帝升平四年嫔孝皇，晋哀帝兴宁元年四月二日生高祖。其日，后以产疾殂于丹徒官舍，时年二十一。葬晋陵丹徒县东乡练壁里雪山。宋初追崇号谥，陵曰兴宁。永初二年，有司奏曰：“大孝之德，盛于荣亲。一人有庆，光被万国。是以灵文宠于西京，寿张显于隆汉。故平原太守赵裔、故洮阳令萧卓，并外属尊戚，不逮休宠。臣等仰述圣思，远稽旧章，并可追赠光禄大夫，加金章紫绶。裔命妇孙可豫章郡建昌县君，卓命妇赵可吴郡寿昌县君。”孙氏，东莞人也。其年又诏曰：“推恩之礼，在情所同。故内树宗子，外崇后属，爰自汉、魏，咸遵斯典。外祖赵光禄、萧光禄，名器虽隆，茅土未建，并宜追封开国县侯，食邑五百户。”于是追封裔临贺县侯。

裔长子宣之，仕至江乘令，蚤卒，无子，以弟孙袭之继宣之绍封。袭之卒，子祖怜嗣。齐受禅，国除。宣之弟伦之，自有传。

孝懿萧皇后讳文寿，兰陵兰陵人也。祖亮，字保祚，侍御史。父卓，字子略，洮阳令。

孝穆后殂，孝皇帝娉后为继室，生长沙景王道怜、临川烈武王道规。义熙七年，拜豫章公太夫人。高祖为宋王，又加太妃之号。高祖以十二年北伐，仍停彭城、寿阳，至元熙二年入朝，因受晋禅。在

外凡五年，后常留东府。高祖践阼，有司奏曰：“臣闻道积者庆流，德洽者礼备。故祗敬表于崇高，嘉号彰于盛典。伏惟太妃母仪之德，化穆不言，保翼之训，光被洪业。虽幽明同庆，而称谓未穷。稽之前代，礼有恒准，宜式遵旧章，允副群望。臣等参受宋王太后号。”故有司奏犹称太妃也。

上以恭孝为行，奉太后素谨，及即大位，春秋已高，每旦入朝太后，未尝失时刻。少帝即位，加崇曰太皇太后。景平元年，崩于显阳殿，时年八十一。遗令曰：“孝皇背世五十余年，古不祔葬。且汉世帝后陵皆异处，今可于茔域之内别为一圹。孝皇陵坟本用素门之礼，与王者制度奢俭不同，妇人礼有所徒，可一遵往式。”乃开别圹，与兴宁陵合坟。初，高祖微时，贫约过甚，孝皇之殂，葬礼多阙，高祖遗旨，太后百岁后不须祔葬。至是故称后遗旨施行。

卓初与赵裔俱赠金紫光禄大夫，又追封封阳县侯，妻下邳赵氏封吴郡寿昌县君。卓子源之袭爵，源之见子思话传。

武敬臧皇后讳爱亲，东莞人也。祖汪，字山甫，尚书郎。父字俊宣义，郡功曹。

后适高祖，生会稽宣长公主兴弟。高祖以俭正率下，后恭谨不违。及高祖兴复晋室，居上相之重，而后器服粗素，不为亲属请谒。义熙四年正月甲午，殂于东城，时年四十八。追赠豫章公夫人，还葬丹徒。高祖临崩，遗诏留葬京师，于是备法驾，迎梓宫祔葬初宁陵。

宋初追赠俊金紫光禄大夫，妻高密叔孙氏封永陵平乡君。俊子焘，焘弟熹，熹子质，自有传。

武帝张夫人讳阙，不知何郡县人也。义熙初，得幸高祖，生少帝，又生义兴恭长公主惠媛。永初元年，拜为夫人。少帝即位，有司奏曰：“臣闻严亲敬始，所因者本，充孝之道，由中被外。伏惟夫人德并坤元，徽音光劭，发祥兆庆，诞启圣明。宜崇极徽号，允备盛则。从《春秋》母以子贵之义，遵汉、晋推爱之典，谨上尊号为皇太后，宫曰

永乐。”少帝既废，太后还玺绂，随居吴县。太祖元嘉元年，拜营阳王太妃。三年，薨。

少帝司马皇太妃讳茂英，河内温人，晋恭帝女也。初封海盐公主，少帝以公子尚焉。宋初，拜皇太子妃。少帝即位，立为皇后。元嘉元年，降为营阳王妃，又为南丰王太妃。十六年，薨，时年四十七。

武帝胡婕妤讳道女，淮南人。义熙初，为高祖所纳，生文帝。五年，被谴赐死，时年四十二，葬丹徒。高祖践阼，追赠婕妤。太祖即位，有司奏曰：“臣闻德厚者礼尊，庆深者位极。故阙宫既构，咏歌先妣，园陵崇卫，聿追来孝。伏惟先婕妤柔明塞渊，光备六列，德昭坤范，训洽母仪。用能启祚圣明，奄宅四海。严亲莫逮，天途永违。臣等远准《春秋》，近稽汉、晋，谨上尊号曰章皇太后，陵曰熙宁。”立庙于京师。

太后兄子元庆，位至奉朝请。

文帝袁皇后讳齐妙，陈郡阳夏人，左光禄大夫敬公湛之庶女也。母本卑贱，后年五六岁，方见举。后适太祖，初拜宜都王妃，生子劭、东阳献公主英娥。上待后恩礼甚笃，袁氏贫薄，后每就上求钱帛以赡与之，上性节俭，所得不过三五万、三五十匹。后潘淑妃有宠，爱倾后宫，咸言所求无不得。后闻之，欲知信否，乃因潘求三十万钱与家，以观上意，信皆便得。因此恚恨甚深，称疾不复见上。上每入，必他处回避。上数掩伺之，不能得。始兴王浚诸庶子问讯，后未尝视也。后遂愤恚成疾。元嘉十七年，疾笃，上执手流涕问所欲，不言，后视上良久，乃引被覆面。崩于显阳殿，时年三十六。上甚相悼痛，诏前永嘉太守颜延之为哀策，文甚丽。其辞曰：

龙輕纊綺，容翟结驥。皇涂昭列，神路幽严。皇帝亲临祖
馈，躬瞻宵载。饰遗仪于组旒，想徂音乎珩佩。悲黼筵之移御，
痛翠褕之重晦。降舆客位，撤奠殡阶。乃命史臣，诔德述怀。其

辞曰：

偷昭蜃升，有物有凭。圆精初铄，方祇始凝。昭裁世族，祥发庆膺。秘仪景胃，图光玉绳。昌辉在阴，柔明将进。率礼蹈和，称诗纳顺。爱自待年，金声夙振。亦既有行，素章增绚。

象服是加，言观惟则。俾我王风，始基嫔德。蕙问川流，芳猷渊塞。方江泳汉，再谣南国。伊昔不造，洪化中微。用集宝命，仰陟天机。释位公宫，登耀紫闈。钦若皇姑，允迪前徽。孝达宁亲，敬行宗祀。进思才淑，傍综图史。发音在咏，动容成纪。壹政穆宣，房乐昭理。坤则顺成，星轩润饰。德之所届，惟深必测。下节震腾，上清胱侧。有来斯雍，无思不极。谓道辅仁，司化莫晰。

象物方臻，视祲告疹。大和既融，收华委世。兰殿长阴，椒涂弛卫。呜呼哀哉！

戒凉在律，杪秋即穸。霜夜流唱，晓月升魄。八神誓引，五辂迁迹。嗷嗷储嗣，哀哀列辟。洒零玉墀，雨泗丹掖。抚存悼亡，感今怀昔。呜呼哀哉！

南背国门，北首山园。仆人案节，服马顾轤。遥酸紫盖，眇泣素轩。灭彩清都，夷体寿原。邑野沦蕪，戎夏悲讌。来芳可述，往驾弗援。呜呼哀哉！

策既奏，上自益“抚存悼亡，感今怀昔”八字，以致其意焉。有司奏谥宣皇后，上特诏曰“元”。

初，后生劭，自详视之，驰白太祖：“此儿形貌异常，必破国亡家，不可举。”便欲杀之。太祖狼狈至后殿户外，手拨幔禁之，乃止。

后亡后，常有小小灵应。沈美人者，太宗所幸也。尝以非罪见责，应赐死。从后昔所住徽音殿前度。此殿有五间，自后崩后常闭。美人至殿前，流涕大言曰：“今日无罪就死，先后若有灵，当知之！”殿诸窗户应声豁然开。职掌遽白太祖，太祖惊往视之，美人乃得释。

大明五年，世祖诏曰：“昔汉道既灵，博平辉绝，魏国方安，嘉宪启策，皆因心所弘，酌典沿诰。亡外祖亲王夫人柔德淑范，光启坤

载。属内位阙正，摄馈闺庭，仪被芳闱，问宣戚里。永言感远，思追荣秩，宜式傍鸿则，敬登徽序。”乃追赠豫章郡新淦县平乐乡君。后之所生母也。又诏：“赵、萧、臧光禄、袁敬公、平乐郡君墓，先未给茔户。加世数已远，胤嗣衰陵。外戚尊属，不宜使坟茔荒秽。可各给蛮户三，以供洒扫。

后父湛之自有传。

文帝路淑媛讳惠男，丹阳建康人也。以色貌选入后宫，生孝武帝，拜为淑媛。年既长，无宠，常随世祖出蕃。世祖入讨元凶，淑媛留寻阳。上即位，遣建平王宏奉迎。有司奏曰：“臣闻历集周邦，徽音充嗣，气淳汉国，沙麓发祥。昔在上代，业隆胙远，未有不敷阴教以阐洪基，膺淑庆以载圣哲者也。伏惟淑媛柔明内昭，徽仪外范，合灵初迪，则庶姬仰耀；引训蕃阃，则家邦被德。民应惟和，神属惟祉，故能诞钟睿躬，用集大命，固灵根于既殒，融盛烈乎中兴。载厚化深，声咏允缉，宜式谐旧典，恭享极号。奉尊号曰皇太后，宫曰崇宪。”太后居显阳殿。

上于闺房之内，礼敬甚寡，有所御幸，或留止太后房内，故民间喧然，咸有丑声。宫掖事秘，莫能辨也。

孝建二年，追赠太后父兴之散骑常侍，兴之妻徐氏余杭县广昌乡君。大明四年，太后弟子抚军参军琼之上表曰：“先臣故怀安令道庆赋命乖辰，自违明世。敢缘卫戍请名之典，特乞云雨，微垂洒润。”诏付门下。有司承旨，奏赠给事中。琼之及弟休之、茂之并超显职。太后颇豫政事，赐与琼之等财物，家累千金，居处服器，与帝子相侔。

琼之宅与太常王僧达并门，尝盛车服卫从造僧达，僧达不为之礼。琼之以诉太后，太后大怒，告上曰：“我尚在，而人皆陵我家，死后乞食矣！”欲罪僧达。上曰：“琼之年少，自不宜轻造诣。王僧达，贵公子，岂可以此事加罪。”

大明五年，太后随上巡南豫州，妃主以下并从。废帝即位，号太

皇太后。太宗践阼，号崇宪太后。

初，太宗少失所生，为太后所摄养，世祖尽心祇事，而太后抚爱亦笃。及上即位，供奉礼仪不异旧日。有司奏曰：“夫德敷于内，典章必远；化覃于外，徽号宜宣。伏惟皇太后懿圣自天，母仪允著，义明八远，道变九围。圣明登御，景祚攸改，皇太后宜即前号，别居外宫。”诏曰：“朕备丁艰罚，蚤婴孤苦，特蒙崇宪太后圣训抚育。昔在蕃閭，常奉药膳，中迫凶威，抱怀莫遂。今泰运初启，情典获申，方欲亲奉晨昏，尽欢闺禁。不得如所奏。”寻崩，时年五十五。迁殡东宫，门题曰崇宪宫。上又诏曰：“朕幼集荼蓼，夙凭德训，龛翫定业，实资仁范，恩著屯夷，有兼常幕。夫礼沿情施，义循事立，可特齐衰三月，以申追仰之心。”谥曰昭皇太后，葬世祖陵东南，号曰修宁陵。

先是，晋安王子勋未卒，巫者谓宜开昭太后陵以为厌胜。修复仓卒，不得如礼。上性忌，虑将来致灾。泰始四年夏，诏有司曰：“崇宪昭太后修宁陵地，大明之世，久所考卜。前岁遭诸蕃之难，礼从权宜。奉营仓卒，未暇营改。而茔隧之所，山原卑陋。顷年颓坏，日有滋甚，恒费修整，终无永固。且详考地形，殊乖相势。朕蚤蒙慈遇，情礼兼常，思使终始之义，载彰幽显。史官可就岩山左右，更宅吉地。明番龟筮，须选令辰，式尊旧典，以礼创制。今中宇虽宁，边虏未息，营就之功，务在从简。举言寻悲，情如切割。”有司奏：“北疆未靖，戎役是务，礼之详略，各沿时宜。臣等参议，修宁陵玄宫补治毁坏，权施油殿，暂出梓宫，事毕即窆，于事为允。”诏可。

琼之为衡阳内史，先后卒。废帝景和中，以休之为黄门侍郎，茂之左军将军，并封开国县侯，邑千户。又追赠兴之侍中、金紫光禄大夫，谥曰孝侯；道庆散骑常侍、光禄大夫、开府仪同三司，谥曰敬侯。立道庆女为皇后，以休之为侍中，茂之黄门郎。太宗废幼主，欲说太后之心，乃下令书曰：“太皇太后蚤垂爱遇，沿情即事，同于天属。前车骑咨议参军路休之、前丹阳丞路茂之，崇宪密戚，蚤延荣贯，并怀所助，宜殊恒饰。休之可黄门侍郎，领步兵校尉；茂之可中书侍郎。”太宗未即位，故称令书。茂之又迁司徒从事中郎，休之桂阳王休范

镇北咨议参军。太宗杀世祖诸子，因此陷休之等，宥其诸子。

孝武文穆王皇后讳宪嫄，琅邪临沂人。元嘉二十年，拜武陵王妃。生废帝、豫章王子尚、山阴公主楚玉、临淮康哀公主楚佩、皇女楚秀、康乐公主修明。世祖在藩，后甚有宠。上入伐凶逆，后留寻阳，与太后同还京都，立为皇后。

大明四年，后率六宫躬桑于西郊，皇太后观礼。上下诏曰：“朕卜祥大昕，测辰拂羽，爰诏六宫，亲蚕川室。皇太后降銮从御，伫跸观礼。绿蘧既具，玄紝方修，庶仪发椒，阐化动中。县妃主以下，可量加班锡。”

废帝即位，尊曰皇太后，宫曰永训。其年，崩于含章殿，时年三十八。祔葬景灵陵。

后父偃，字子游，晋丞相导玄孙，尚嘏之子也。母晋孝武帝女鄱阳公主，宋受禅，封永成君。偃尚高祖第二女吴兴长公主讳荣男，少历显官，黄门侍郎，秘书监，侍中。元嘉末，为散骑常侍、右卫将军。世祖即位，以后父，授金紫光禄大夫，领义阳王师，常侍如故。迁右光禄大夫，常侍、王师如故。偃谦虚恭谨，不以世事关怀。孝建二年卒，时年五十四。追赠开府仪同三司，本官如故，谥曰恭公。

长子藻，位至东阳太守。尚太祖第六女临川长公主讳英媛。公主性妒，而藻别爱左右人吴崇祖，前废帝景和中，主谗之于废帝，藻坐下狱死，主与王氏离婚。太始初，以主适豫章太守庾冲远，未及成礼而冲远卒。

宋世诸主，莫不严妒，太宗每疾之。湖孰令袁悟妻以妒忌赐死，使近臣虞通之撰《妒妇记》。左光禄大夫江湛孙敷当尚世祖女，上乃使人人为敷作表让婚，曰：

伏承诏旨，当以临海公主降嫔，荣出望表，恩加典外。顾审
辀蔽，伏用忧惶。臣寒门顿族，人凡质陋，闾阎有对，本隔天姻。
如臣素流，室贫业寡，年近将冠，皆已有室，荆钗布裙，足得成
礼。每不自解，无偶迄兹，谋访莫寻，素族弗问。自惟门庆，属

降公主，天恩所覃，容及丑末。怀忧抱惕，虑不获免，征命所当，果膺兹举。虽门泰宗荣，于臣非幸，仰缘圣贷，冒陈愚实。

自晋氏以来，配尚王姬者，虽累经美胄，亟有名才，至如王敦慑气，桓温敛威，真长佯愚以求免，子敬负足以违诏，王偃无仲都之质，而裸露于北阶，何瑀阙龙工之姿，而投躯于深井，谢庄殆自同于矇室，殷冲几不免于强俎。数人者，非无才意，而势屈于崇贵，事隔于闻览，吞悲茹气，无所逃诉。制勒甚于仆隶，防闲过于婢妾。往来出入，人理之常，当宾待客，朋从之义。而令埽撤息驾，无窥门之期，废筵抽席，绝接对之理。非唯交友离异，乃亦兄弟疏阔。第令受酒肉之赐，制以动静；监子荷钱帛之私，节其言笑。姆奶争媚，相劝以严；嫗媪竞前，相谄以急。第令必凡庸下才，监子皆葭萌愚竖，议举止则未闻是非，听言语则谬于虚实。姆奶敢恃耆旧，唯赞妒忌，嫗媪自倡多知，务检口舌。其间又有应答问讯，卜筮师母，乃至残余饮食，诘辩与谁，衣被故敝，必责头领。又出入之宜，繁省难衷，或进不获前，或入不听出。不入则嫌于欲疏，求出则疑有别意，召必以三晡为期，遣必以日出为限，夕不见晚魄，朝不识曙星。至于夜步月而弄琴，昼拱袂而披卷，一生之内，与此长乖。又声影裁闻，则少婢奔进，裾袂向席，则老丑丛来。左右整刷，以疑宠见嫌，宾客未冠，以少容致斥。礼则有列媵，象则有贯鱼，本无漫嫡之嫌，岂有轻妇之诮。况今义绝傍和，虔恭正匹，而每事必言无仪适，设辞辄言轻易我。又窃闻诸主集聚，唯论夫族。缓不足为急者法，急则可为缓者师，更相扇诱，本其恒意，不可贷借，固实常辞。或言野败去，或言人笑我，虽家曰私理，有甚王宪，发口所言，恒同科律。王藻虽复强健，颇经学涉，戏笑之事，遂为冤魂。褚媛忧愤，用致夭绝。伤理害义，难以具闻。

夫螽斯之德，实致克昌，专妒之行，有妨繁衍。是以尚主之门，往往绝嗣，驸马之身，通离衅咎。以臣凡弱，何以充堪。必将毁族沦门，岂伊身眚。前后娶此，其人虽众，然皆患彰遐迩，

事融天朝，故吞言咽理，无敢论诉。臣幸属圣明，矜照由道，弘物以典，处亲以公，臣之鄙怀，可得自尽。如臣门分，世荷殊荣，足守前基，便预提拂。清官显宦，或由才升，一叨婚戚，咸有恩假。是以仰冒非宜，披露丹实。非唯止陈一己，规全身愿，实乃广申诸门忧患之切。伏愿天慈照察，特赐蠲停，使燕雀微群，得保丛蔚，蠹物含生，自己弥笃。若恩诏难降，披请不申，便当刊肤剪发，投山窜海。

太宗以此表遍示诸主。于是临川长公主上表曰：“妾遭随奇薄，绝于王氏，私庭器戾，致此分异。今孤疾茕然，假息朝夕，情寄所钟，唯在一子。契阔荼炭，持兼怜愍，否泰枯荣，系以为命。实愿申其门衅，还为母子，推迁僂俛，未及自闻。先朝慈爱，鉴妾丹衷。若赐使息彻归第定省，仰揆天旨，或有可寻。今事迫成切，不顾典宪，敢缘思煮，触冒披闻。特乞还身王族，守养弱嗣。虽死之日，实甘于生。”许之。

藻弟懋，升明末贵达。懋弟攸，太宰从事中郎，蚤卒，追赠黄门侍郎。弟臻，升明末显宦。

前废帝何皇后讳令婉，卢江潯人也。孝建三年，纳为皇太子妃，大明五年，薨于东宫徽光殿，时年十七。葬□□，谥曰献妃。上更为太子置内职二等，曰保林，曰良娣。纳南中郎长史太山羊瞻女为良娣，宜都太守袁僧惠女为保林。废帝即位，追崇献妃曰献皇后。太宗践阼，迁后与废帝合葬龙山北。

后父瑀，字稚玉，晋尚书左仆射澄曾孙也。祖融，大司农。瑀尚高祖少女豫章康长公主，名欣男。公主先适徐乔，美容色，聪敏有智数，太祖世，礼待特隆。瑀豪竞于时，与平昌孟灵休、东海何勖等，并以舆马骄奢相尚。公主与瑀情爱隆密，何氏外姻疏戚，莫不沾被恩纪。瑀历位清显，至卫将军。大明八年，公主薨，瑀墓开，世祖追赠金紫光禄大夫，加散骑常侍。

子迈，尚太祖第十女新蔡公主，名英媚。迈少以贵戚居显宦，好犬马驰逐，多聚才力之士。有墅在江乘县界，去京师三十里。迈每